

Date – 05/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n Zo hnahtlak hmun hrang hranga cheng an inpumkhat chho mekah kohhran thlenga inpumkhatna a thleng tawh a ti.
2. Tehna hrang hrang hmanga zirna endikna, PARAKH Rashtriya Sarvekshan 2024 chu Mizoram chhunga school thlan bik 1058-ah kalpui tan a ni.
3. President Draupadi Murmu-i chuan India chu tuifinriata veivahna, lawnglian siamna leh fur behchhana tuipui hman tangkai kawngah a hmahruaitu a ni a ti
4. BJP hruaitu senior Devendra Fadnavis chu Maharashtra Chief minister thar atan vawin tlaiah lakluh a ni dawn.

<><><>

ZOFEST CM

Chief Minister Pu Lalduhoma'n Zo hnahtlak hmun hrang hranga cheng an inpumkhat chho zel a ti a, kohhran thlenga inpumkhatna a awm tawh tih sawiin ramchhung leh rampawna zofate inpumkhatna lam hawi zel a pawimawh tih a sawi.

Mizo Zirlai Pawl buatsaih Zofest 2024 West Phailenga Lalbuanga Runa neih a hmanpui na ah sawiin Chief Minister chuan Mizoram pawna zofa awm te inpumkhat tura tan lak a pawimawh a ti a, ram hrangah awm mahse zo hnahtlakte chu inpumkhatna lam hawia tan la thar zel turin a chah a ni.

Pu Lalduhoma chuan Zofate tam an ngai tih sawiin fa ngah a tul a ti a, Mizoram chu ram dangte nena khaikhinin mi cheng an la tlem tih sawiin Pun chu sawrkar policy a nih avangin nupa, fa pathum leh a aia tam nei chinte hamthatna duan an rilruk a ti bawk.

Chief Minister chuan Ram ro hlu ber chu human resource tha a ni a ti a, Ram leilung hausa tak te pawh a chhunga cheng mipuite thiamna leh theihnain a tlin loh chuan ram changkang an ni lo tih sawiin thalaiten zirna uar a pawimawh a ti a, Handholding hmangin khai chhuah tlak thalaite, an bana kaia din chhuahtir an tum tih sawiin Dahkham ngai lovin hmalakna tur loan an la thei dawn a ti a, thalai ruihhlo avanga thi an tam chu pawl atih thu sawiin ruihhlo do kawngah sawrkarin theihtawp a chhuah chhunzawm zel dawn ati bawk.

Kumina Zofest hi vawi sawmna a ni a, thupui atan "Hrui khat vuanin" tih chu hman a ni.

<><><>

HEALTH MINISTER

Health Minister Pi Lalrinpui'n Mizorama damlo enkawlna hmun hrang hrang tihchangtlun nan CSR Fund dap zel a pawimawh a ti a, Company tam tak Mizorama lo luh an chak avangin ram tana hmasawna tur ngaihtuah thiam a pawimawh tih a sawi.

He thu hi nimina Mizoram State Cancer Institute (MSCI) Zembawk ah Cancer damlote tan inzai theihna 'Surgical Services' bultanna Operation Theatres Complex leh damlo 7 dah theihna ICU a hawna ah sawiin Pi Lalrinpui chuan MSCI ah inzai theihna leh ICU hawn chuan mipui harsa zawk tam tak, phai panna tur neilo ten nasa takin an chhawr tangkai thei dawn a ti a, Aizawl Civil Hospital leh ZMC ah inzai ngai te chu MSCI ah an inzai thei tawh dawn tih sawiin damdawiin lian 2 te a chhawk zangkhai thei dawn a ti bawk. MSCI ah Surgery Services hawn thei anih dan tlangpui te sawiin

Minister chuan Mizoram PHC ah damlo admit an tlem laiin District Hospital mipuiin an bawr hle a ti a, District khawpuia damdawiin thenkhat leh thingtlang damdawiin hrang hrang hmanraw changkan lama an pachhe deuh tih sawiin Damdawiin lian pawh tih changtlun zel a ngai a ti a, ZMC a IVF, lung zaina Cardiothoracic Surgery bakah thluak zaina Neurosurgery te tan anih theih nan kawng te dap mek anih thu sawiin Sawrkarin damlo enkawlna hmun thum chak chu a ngai mawimawh tih a sawi bawk.

MSCI ah hian cancer zai thei doctor pathum (gynane onco surgeon, onco surgeon superspecialist leh head and neck onco surgeon) an awm awm tawh a, an mahni puitu anesthesiologist leh thawktu dang dah belhin damlo zai hi tan a ni a, hemi in a mamawh leh a ken tel ICU khum 7 awmna pawh hawng nghal niin Operation Theatres Complex hnuai ah hian Major OT 2 leh Minor OT 1 a awm a. Hengte hi Sawrkar Laipui Scheme 'Tertiary Cancer Care Centre' scheme hnuai ah din leh sak niin tun dinmun ah doctor 16 an thawk mek a ni.

<><><>

ZO INDEGENOUS IDENTITY CARD

Mizoram Assembly Speaker Pu Lalbiakzama'n zo hnahtlak hmun hrang hranga cheng te in chhawmdawl tawn zel a pawimawh a ti a, ram thenhran ah awm mahse thisena inzawm annih avangin inlunguala insuihkawm zual a ngai tih a sawi.

He thu hi ZORO buatsaih Zo Indigenous Identity Card a pisaa nimina a tlangzarh naah sawiin Pu Lalbiakzama chuan UNO-in indigenous people-te a ngaihpawimawh thu leh zofate chu indigenous people-a a pawm tawh thu sawiin, hnam lian leh chak zawkte'n an awpbeh mek indigenous people-te chhanchhuah an nih theih nan UN Declaration on the Rights of People's chu kum 2007 daih tawhah siam a ni a ti a, UNO thupuan chu hman tangkai thiam a tul tih sawiin ZORO General Headquarters-in 'Zo Indigenous Identity Card' an siam chu chuan zofate'n dikna chanvo an chan theih nana tangkai taka hman a nih ngei a beisei thu a sawi.

Pu Lalbiakzama chuan zofate chu British Sawrkar 'divide and rule policy' tuar nasa ber a nih thu sawiin ram bung pathum India, Burma leh East Pakistan (Bangladesh) ahte thensawm an ni a ti a, India-ah State pali Mizoram, Manipur, Tripura leh Assam-ah te thendarh an ni leh tih sawiin hmun hrang hrangah awm mahse inlungual taka an awm zel a pawimawh a ti a,

insuihkhawmna thinlung pu theuh turin zo hnahtlak te a ngen tih a sawi bawk.

<><><>

C&I MINISTER

Commerce & Industries Minister Pu F Rodingliana'n ZOPA Concrete Block Industry hawmna hun hmanpuiin Industry la din zel turte pawh sorkar chuan puih a huam reng tih a sawi.

Commerce & Industries Minister chuan Mizote'n kan ram chungsa siam, kan mamawh em em, Mizo siam dik tak cubic lung kan ban phaka a awm tawh tur chu a ropui hle a ni, a ti a, hlawhtling tur chuan taimakna leh tih tak takna rilru neih a tul thu a sawi bawk.

Industrial Growth Centre, Luangmual-ah ZOPA Concrete Block Industry hawmna inkhawmah hian Minister hi Commerce & Industries Department Secretary Pu Lalzirmawia Chhangte leh Director Pi Maria CT Zuali-te'n an tawiawm a ni.

<><><>

PARAKH RASHTRIYA SARVEKSHAN

Department of School Education and Literacy, Ministry of Education buatsaih PARAKH Rashtriya Sarvekshan 2024 (PRS 2024) chu Mizoram chungsa school thlan bik 1058-a Pawl 3, Pawl 6 leh Pawl 9 zirlaiteah kalpui a ni.

National Achievement Survey (NAS) tiha hriat thin PARAKH Rashtriya Sarvekshan 2024 (PRS 2024) hi Central sorkar hmalakna niin survey ah hian School Education Minister Dr Vanlalhlana kaihhruaiin Department hotuten school hrang hrang an tlawh a, PARAKH chuan National Level Observer atan IASE Mizoram Principal Prof Lallianzuali Fanai, chu a ruat a. Tehna chi hrang hrang hmangin Mizorama PRS 2024 hi felfai taka kalpui ani em tih a enfiah a ni a, survey kalpuina tur atan hian State Level Coordinator pahnih SCERT Director leh Samagra Shiksha State Project Director ruat niin anni bakah hian district tina DIET Principal leh DPC te chu District Level Coordinator niin, Field Investigator atan DIET zirlaite hman an ni bawk.

PARAKH Rashtriya Sarvekshan 2024 hi India rama zirna chungchanga survey lian ber niin zirlaiten an thiam chhuah tura duante an zir chhuak em tih enna tura buatsaih a ni. National Education Policy (NEP) 2020 ina zirna atana a tum bulpuite ngaihpawimawh a nih dan te, zirnaa hnufualna te, zirna huapzo kalpui a nih dan bakah education policy duangtuten quality education atana policy tha tak an duan chhuah theihna tura an hriat tur pawimawhte he survey hian a hrin chhuah beisei a ni.

<><><>

PRESIDENT

President Draupadi Murmu-i chuan India chu tuifinriata veivahna, lawnglian siamna leh fur behchhana tuipui hman tangkai kawngah a hmahruaitu a ni a ti. Nimina Puri, Odisha-a Navy Day hmannaah he thu hi sawiin Pi Murmu-i chuan India chu tuipui behchhan ram ropui tak a ni tih sawiin tuifinriat hual vel ram zau tak nei a ni a. Thliarkar pawimawh tak tak leh tuifinriata hmasawmna ruhrel ropui tak tak nei ram a ni a ti a. Tuifinriata venhimna tha

pe turin Indian Navy te chuan hna an thawk chhonzawm zel dawn tih sawiin Viksit Bharat 2047 atan pawh an thawhhlawk hle dawn a ni a ti bawk.

Navy Day hi Operation Trident champhaah hman thin a ni a. Ku m 1971-a India leh Pakistan indonaah khan India indo lawng 15, tuihnuai lawng leh thlawhna 40 chuangten Marine Commando te leh Indian Army te nen tanghoa beihpui an thlak hriatrengna a ni.

<><><>

MAHARASTRA CM

BJP hruaitu senior Devendra Fadnavis chu Maharashtra Chief minister thar atan vawin tlaiah lakluh a ni dawn. Mahayuti hruaitu Devendra Fadnavis, Shiv Sena hruaitu Eknath Shinde leh NCP hruaitu Ajit Pawar te chuan nimin khan Governor C.P Radhakrishnan chu Raj Bhavanah hmuin sawrkar an siam theih thu an thlen a. Mahayuti-a MLA 237 thlawpna lehkha an keng tel a ni.

Nimin khan BJP Core Committee thukhawm chuan legislature party leader atan Devendra Fadnavis hi an thlang a. He hunah hian BJP central observer Union Finance Minister Nirmala Sitharaman leh Gujarat Chief Minister hlui Vijay Rupani ten an tel pui a ni.

<><><>

EAM

External Affairs Minister Dr. S. Jaishankar-a chuan India leh China inlaichinna a that theih nan ramri-a remna leh muanna siam a pawimawh a ti. Nimina Rajya Sabha rorel inkhawmah he thu hi sawiin Pu Jaishankar-a chuan India leh China inlaichinnaa tunhnaia hmasawna tarlangin hun reiloteah inbiak leh a ni dawn a ti a. Hetah hian ramri-a inepna tiziaawm tur leh ramri enkawl kawnga mumal zawka ruahmanna siam dan sawiho a ni ang a ti.

<><><>